

問如是一時婆伽婆在舍衛城祇樹給孤獨園是時世尊告諸比丘若慈心解脫親近廣中修行以辦獲使起善具足便當有十一報十一果云何爲十一卧安覺安不見惡夢天護人愛非人所敬不毒不兵水火不喪亦不加刑身壞命終生善處梵天上於諸善法速得捷疾能盡有漏行比丘慈心解脫親近廣布修行以辦以獲使起善具足當有此十一法是故諸比丘當求方便慈心解脫如是諸比丘當作是學爾時諸比丘聞佛所說歡喜

奉行

佛說十一想思念如來經

佛說四泥犁經

東晉西域沙門竺曇無蘭譯

聞如是一時婆伽婆在舍衛城祇樹給孤獨園爾時世尊告諸比丘有四大泥犁云何爲四諸比丘提舍大泥犁瞿波離比丘大泥犁

栴婆達兜大泥犁末佉梨大泥犁諸比丘彼
提舍大泥犁身出火焰長二十肘諸比丘瞿
波犁大泥犁身出火焰長三十肘諸比丘調
達大泥犁身出火焰長四十肘末佉梨大泥
犁身出火焰長六十肘諸有人民欲求安隱
獲其義者若二十大海水灌彼身上彼海水
盡火不滅猶如融銅若有人以二十滴水著
彼融銅中彼水滴速疾滅彼提舍比丘亦復
如是火焰不滅若復有人欲求安隱獲其義
者復以二十大海水灌其身上彼水速盡所

以然者彼提舍比丘愚人遮比丘僧使一日
不食以此因緣使提舍比丘入大地獄諸有
比丘於瞿波離比丘有一人起欲使安隱獲
其義者以三十大海水灌其身上彼大海水
速盡譬如二日所融銅或有一人以三十滴
水著融銅中消盡無餘此亦如是瞿波離比
丘愚人或有人起欲使獲安隱義者以三十
大海水灌其身上彼大海水速盡所以然者
彼瞿波離比丘愚人謗舍利弗目犍連比丘
身壞命終生三惡道墮鉢頭摩地獄以此因

緣瞿波離比丘入大泥犁彼調達大泥犁若復有人欲使獲安隱義者復以四十大海水濯其身上彼大海速盡彼火不滅譬如三日所融銅若有人以四十滴水著融銅中即時消盡無餘此亦如是調達愚人若有人起欲使獲安隱義以四十大海水灌其身上彼大海水速盡彼火不滅所以然者調達愚人欲害如來然阿羅漢比丘尼壞亂比丘僧身壞命終趣三惡道生阿鼻地獄中由此因緣使彼調達比丘入大地獄身出火焰長四十肘

諸有比丘彼末伽梨大泥犁若有一人起欲使獲安隱義以六十大海水灌其身上彼海水速盡彼火不滅譬如四日所融銅若有人以六十滴水著融銅中即時消盡無餘彼末伽梨亦復如是若有一人起欲使獲安隱義者以六十大海水灌其身上彼大海水速盡此火不滅所以然者此末伽梨愚人教受百拘梨人使行邪見以此因緣使末伽梨身出火焰長六十肘如是諸比丘四大泥犁時諸比丘聞佛所說歡喜奉行

佛說四泥犁經

舍衛國王夢見十事經

失譯人名 今附西晉錄

佛在舍衛祇洹阿難郊坻阿藍時國王波斯匿夜卧夢見十事何謂爲十事一者見三瓶併兩邊滿中央空兩瓶滿沸氣交往來不入

空瓶中二者見馬口亦食尻亦食三者見小樹生華四者見小樹生實五者見一人切繩人後有羊主食繩六者見狐坐於好床食以金器七者見大牛還從小犢子乳八者見四牛從四面鳴來相趣欲闔當合未合不知牛處九者見大陂水中央濁四邊清十者見溪水著十流正赤王夢已即覺王大惶怖恐亡其國軀明日王即召公卿大臣及明道知解夢者婆羅門皆到王前王即爲說夜夢十事誰能解者諸解能解者即言我能解之恐王聞之